

Festpredigt 600 Jahre St. Helena, Joh 7,37-39, 26.5.21

„Wen da düstet, der komme zu mir und trinke! Wer an mich glaubt, von dessen Leib werden, wie die Schrift sagt, Ströme lebendigen Wassers strömen...“

Vur 600 Joär hams di Kärch baud und eigweiht. Und seiddem feiern di Leid as dem Dorf do inna Goddesdinsd. Sie heirädn und bringa ihre Kinner zum Daufm. Mid Lebmswasser, mid lebendichn Wasser, mit Wasser fiers Lehm, was di Kinner durchdrohng soll. Und mier daufms scho, wenss klaa sin, und wolln dodermied sohng: Scho am Onfang, wenssd nu ganz klaa bisd, wenssd nu goär nix geleised und vollbrachd hasd, wenssd nu ganz ohgwiesen bisd af die Großn, wenssd nunni af deine eichna Baa schdeh kannsd.

Scho ganz am Onfang sachd der gude Godd: „Iech hob diech lieb.“

Ja, wenss klaa sin, do heärmer uns manchmoll sohng: „Iech bin gschbannd, was as dera klann Maus amol werd.“ Oder: „Däss mecherdi nu derlehm, wenn der klaa Niegl amol groß is.“ Noja, und wenss dann groß sin, dann sehngmer was fier verschiedene Leid do herinna daufd worn sin, in dena 600 Joär, und was as dena worn is:

Schlaue und ned su schlaue. Hadscherde und Quadscherde, Grode und Bugglerde, Wärcher und Faulenzer, Fleißiche und Gemüdlische, Bldzsaubere und Verlodderde. Drauriche und Lusediche. Geizkrähng und Schben-dable. Reiche und Arme. Bescheidne und solche, wu nie gnuuch grieng. Hidzerblidz und Besonnene. Ohgeber und Schdille. Kärngschbringer und Kärngflüchder. Scheinheiliche und Streithammel und Düfdler und Wärdshaus hogger und Dorfradschn. Scheene Männer und schdarke Frauen.

Welche, dena wu des Lehm übl midgschbiel had, die wu aan Dreffer nachn annern grichd ham. Und solche, die wu des Glügg anscheinend gebachded ham und die wu immer af der Sunnaseidn glibbd ham. Und aa ganz normole, su wi Sie und iech, wobei des ja aa ned normol is, wenn aans ongeblidch dodol normol is.

Tja, was as dena alles worn is, wu do daufd worn sin: Ganz verschiedn. Obber alle geliebde Kinner Goddes. In liebm Godd sei großer Diergardn. Alle daufd mid dem Lebmswasser. Seid 600 Joär. Kammer si goärned vuurschdeln.

Ja und dann wachsmar dähler, mier lerna laafm und schbrechn. Mier wern immer selbschdändicher. Mier nehma die Woär in di Händ und meisdern unser Lehm, mehr odder wenicher, besser odder schlechder. Und mier maana manchmoll: Das schaffi allaans. Iech brauch kann. Des griechi alles selber hie.

„Wer da düstet, der komme zu mir und trinke!“

Ja, von wegn, des griechi alles selber hie. In Wirklichkeid sin mier dodol abhängig. Mier verwelkn und schderm schneller wimmer denkn, wemmer ned des krieng, was uns am Lehm häld.

Mier schderm in a boär Sekundn, wemmer ka Lufd grieng. Mier schderm in a boär Dooch, wemmer ka Wasser grieng. Mier schderm in a boär Wochn, wemmer nix zum Essn grieng. Mier schderm in a boär Joär, wemmer ka Liebe krieng.

Es is ka Schbass, wemmer af Indensiv licht und nach Lufd schnabbd und künsdlich beadmed wädd. Es is ka Schbass, wemmer sei Lebdooch ka Menschn had, die wu aan lieb ham.

Obber heid simmer bom Wasser. Bom Wasser, was fier uns lehmsnodwendich is.

Ich wass nu, als Kinner simmer immer mid unsere Fohrräder afm Schobladz gfohrn. Jedn Dooch. Woschd obs grengd had odder ob die Sunna gschiene had. Woschd ob der Schdurm unsern Bolln in a kombledd andere Richtung driem had. Odder ob der Bladzrehng den Bladz in a aanziche riesngroße Wasserbfüdzn verwandld had.

Im Hochsummer wors gscheid haas, obber do hads nix zum drinkn gehm af dem Schbobladz. Obber nehmdro in a Wäldla, do had die olde Frau Horvath gwohnd. Und die had in ihrn Gaddn an diefm Brunna ghabbdmid anner Handbumbm. Und im Summer hammer immer bo der Frau Horvath klingld, und na is rauskumma mid aaner Flaschn, und na hads mid anner Bumbm des kosdbore Wasser raufbumbd fier uns klann Fußboller.

Und an des Wasser, do erinner ich mich bis heid. Wi kühl des woär! Wi gud des gschmeeggd had! Wi des in Hals nundergloffm is! Do wärsd am libbsdn a Giraffm gwesn mid an zwaa Meder langa Hals. Wi die Lebmsgeisder widder zrüg kumma sin. Und wimmer numoll unsere haaßn und schwidzerdn Köbf under den Auslauf gschdeggd ham. Und wimmer widder Krafd und Energie fier die zweide Halbzeid ghabbd ham.

Des woär der Bumbbrunna vo der Frau Horvath, a Flüchdlingsfraa in an klann Haisla in an Wäldla.

Der Mensch is doschdi. Doschdi, ganz ohne Hindersinn, nach Wasser. Di Menschn ham si immer do ohgsiedld, wus a Wasser gehm had. Die großen Kuldurn sin am Nil endschdandn, am Euphrat und am Tigris. Die Handlsweeche vo die Karawanen sin do lang ganga, wus Oasn gehm had.

Der Mensch is doschdi. Und die Viecher aa. Elefandn, Löwm, Andilobm laafm 50, 100 Kilomedere weid zum nächsdn Wasserloch. Mir sind doschdi. Mier braung Wasser.

Es is ka Zufall, däss mier des Word „Doschd“ fier alles verwendn, wonach mier a Sehnsuchd ham. Mier ham an Doschd nach Lehm. Mier ham an Doschd nach Onerkennung. Unser Seele is genauso doschdi, wi unser Hals.

Im Hebräischn, in der Schbrooch vom Aldn Desdamend, da gibbds a Word, des hassd „Näfäsch“. „Näfäsch“. Und des Faszinierende is, däss „Näfäsch“ zwaa Haubdbedeutunga: „Näfäsch“ hassd „Kehle“ – also des, wo des Brunnenwasser vo der Frau Horvath genüßlich und dursdlöschnd nunderleffd. Kehle. Und di zweide Bedeutung vo „Näfäsch“ is „Seele“. Des andere in uns, wos doschdi is.

Ja, wall aa unser Seele is doschdi. „Wie der Hisch schreit nach frischem Wasser, so schreit meine Seele, Gott, zu dir. Meine Seele dürstet nach Gott, nach dem lebendigen Gott.“ Psalm 42. Odder unser bekandesder Psalm, der Psalm 23: „Er weidet mich auf einer grünen Aue und führet mich zum frischen Wasser. Er erquicket meine Seele.“

Mier ham an Doschd. Mier ham a Sehnsuchd. Mier sin unser Lebdooch af der Suche, wimmer unsern Doschd schdilln können. Unsern Kehldoschd und unsern Seelndoschd. Und simmer ehrlich: Ofd kömmers a goär ned unterscheidn. Ofd wissmer vielleicht goärned, wos des fier a Doschd grad is und wumid mier unsern Doschd edz löschn können. Do is of bloß su a Sehnsuchd, su a Ohnung: lech brauch ercherdwos, obber iech was goär ned wos. In manchn Phasn vo unsern Lehm suhngmer ercherdwos, wos unsern Doschd schdilld – obber nach wos?

Und des is ja goär ned schlimm, des is ja des Wesn vo uns Menschn, däss mier af der Suche sin. Und däss mier uns a dro freia, wemmer wos gfundn ham, wos uns gud dud. Wemmer wos finden, wos unsern Doschd befriedichd. Dässmer midn Modorrod durch di Fränkische fohrn. Dässmer mid unsere Kinner hinder an Bolln herrenna. Dässi mid meiner Fraa in a wunderboärs Konzerd geh. Dässmer uns in an Liecheshdull an Schdrand sedzn und afs Meer nausschaua. Unser Doschd is wos Guds.

Und es is doch wos wunderbores, wenn die liebe Seel a Ruh had. Wenns Momende gibd, wummer sachd: Su kammers aushaldn! Mehr willi goär ned, mehr brauchi goär ned. Seele, wos willsdn mehr?

Obber kloär, ofd renna mer aa hinder Sachn her, wummer im besdn Fall hoffndli rechdzeidi merkn: Des isses ned! Des löschd mein Doschd ned. Im Gehngdeil, iech brauch immer mehr dervo, und es befriedichd mi ned, es bringdmer nix, es führd ned in di richdiche Richdung. Die Dosis wird immer höher: Saufm löschd ned in Doschd, sondern machd bloß nu mehr Doschd. Wer Geld had, brauchd mehr Geld. Wer Erfolg had, brauchd mehr Erfolg. Wer wos leiseded, will nu mehr leisdn. Wer fasd alles erreichd had, dem langds immer nunni. Wer sein Kalendermid Dermine vullblasderd had, schreibd nu mehr nei.

Der Schdillschdand und die Zufriednheid ham in unser an Leisung und Erfolg oriendierdn Weld kanne gud Kaddn. Und wer sachd: „lech bin fei vollkommen zufriedn.“ Der wird bleed ohgschaid. Wos isn mid dem los? Der is zufriedn? Des Wodd kenni goär ned.

Naa, ofd simmer af der Suche und ham an Doschd nach dem, wos uns ned gud dud und wos bloß a Abkladsch is. Su wis bom Profedn Jeremia hasd: „Mich, die lebendige Quelle, verlassen sie und machen sich Zisternen, die doch rissig sind und das Wasser nicht halten.“ Manchmol dauschmer wi der Hans im Glügg: In dem Fall die lebendiche Quelle gecher a abschdandns Wasser, af des wummer uns mords wos eibildn.

Ja, obber des is edz ka Kridigg. Wall su sin mier Menschn hold gschdriggd. Mier ham a Sehnsuchd. Mier ham an Doschd. Mier sin af der Suche. Und manchmol verlaafmer uns. Und manchmol findmer is richdiche. Manchmol glei, manchmal nach an mords Umweech.

Und der Godd, der uns gschaffm had, mid unserer Kehle und mid unserer Seele. Der uns gmachd had mid unserer Zerbrechlichkeit, mid unsere Narbm und Dreffer. Den sei Liebe uns als Kinner in der Dauf kanne Bedingungen gschdelld had. Der uns af di Suche gschiggd had. Der brichd ned mid uns, wemmer mol afm Holzweech sin.

Ja, obber woran sehngmer des, des Godd su is?

Mier sehng des, wis Godd gekreuzichd ham und wi er grad schee nu rausbringd: „Mich dürstet.“ lech hob an Doschd. Der waas genau, wie sich a Doschd ohfühld. Der waas genau wi des is, wenn aan die Zunga am Gaumen klebd. Wi des is, wenn die Seele Angsd had.

„lech hob an Doschd“.

Und waller des genau waas, und ned bloos waas, sondern an Doschd wärkli durchliddn had. Drum schdehder immer an unserer Seidn, egol wos as uns worn is. Egol af welche Holzweeche mier grodn weecher unsern Doschd. Egol welche rissichn Zisdernen mier fier a lebendiche Quelle haldn odder ghaldn ham.

So und edz schauer zrigg af 600 Joär. Und die aane Frooch zum Schluss, die kömmer sicher ned eindeutig beandwordn.

Die Frooch lauded: St Helena – sin do in 600 Joär Schdröme lebendichn Wassers gflossn? Odder woär mancher Goddesdinnsd wi a rissiche Zisterne, wu is Wasser ned häld? Ham di Menschn ihrn Doschd gschdilld grichd, in dera Kärch? Odder wor manche Bredichd ofd su druggn wi Schdroh?

Hads wos gehm fier di Seele und ihr Sehnsuchd? Odder hams gsachd: Hob edz gemmer nu ins Wärdshaus, do gibbds wengs wos fier di Kehle?

lech denk, alles zwaa. Gott sei Dank kummds do ned af uns oh. Mier sin Menschn. Obber er had uns daufm lassn. Er had uns lieb. Er häld zu uns und häld uns am Lehm. Schdröme lebendichn Wassers. Amen.